

四庫全書

集部

欽定四庫全書

集部  
華泉集卷一

詳校官中書<sub>臣</sub>沈 颺

中書<sub>臣</sub>劉源溥覆勘

總校官庶吉士<sub>臣</sub>倉聖脉

校對官編修<sub>臣</sub>蕭九成

謄錄監生<sub>臣</sub>朱文佐

欽定四庫全書

集部六

華泉集

別集類五

明

提要

臣等謹案華泉集十四卷明邊貢撰貢字廷寔華泉其號也歷城人弘治丙辰進士官至南京戶部尚書是集凡詩八卷文六卷魯中立海岳靈秀集曰華泉之作雖不逮何李然平淡和粹孝廟以前海岱之才無其倫比胡

應麟詩藪曰世人獨推李何為當代第一余  
以為空同關中人氣稍過勁未免失之怒張  
大復之亮節俊語出于天性亦自難到但工  
於文句而乏意外之趣獨邊華泉興象飄逸  
而語尤清圓故當共推此人陳子龍明詩選  
則曰尚書才情甚富能于沉稳處見其流麗  
聲價在昌穀之下君采之上今考其詩才力  
雄健不及李夢陽何景明善于用長意境清

遠不及徐禎卿薛蕙善于用短而夷猶于諸  
人之間以不戰為勝無憑陵一世之名而時  
過事移日久論定亦不甚受後人之排擊三  
人所論當以子龍為持平矣昔薛蕙于嚴嵩  
為同年頗相唱和及嵩柄國蕙即謝絕往還  
併削去舊作不留一字至今為論者所稱是  
集乃取送嵩之作列為壓卷不免見疑于清  
議然詩集為貢沒之後其里人劉天民所編

時當嘉靖戊戌正嵩權熾盛之日或天民無識趨附時局以為榮非貢本志歟其文集亦大名魏允孚所續刊自明以來談藝家置而不論今核其品格實遠遜有韻之詞盖才有偏長物不兩大附詩以行視為琬琰之藉可矣乾隆四十三年九月恭校上

總纂官臣紀昀臣陸錫熊臣孫士毅

總校官臣陸費墀

華泉集原序

余讀華泉先生集蓋有世道之感焉昔者孔子曰先進於禮樂野人也後進於禮樂君子也如用之則吾從先進文勝之敝人至以先進為野人此其已溺而不可返孔子豈不知之而猶力為之辨曰吾從先進云云聖人固以為文質彬彬吾志誠在斯焉已且安知斯人之果不吾從也我明當孝廟之世皇運熙宏人文樸茂學古之士並軫而翔闕西則李獻吉汝南則何仲默吳中則

徐昌穀歷下則邊庭實庭實先生字也獻吉之詞雄仲  
默之詞逸昌穀之詞蒼先生之詞溫然粹然即人自為  
家究之緣情示志體物敘倫動軌自然不殊也雖其人  
已往間嘗諷其詞猶足以想見其人與夫當時政治風  
俗之盛今之學士大夫文非左國遷固雄向則亡稱詩  
非石植明遠靈運甫白則亡稱然其氣飄忽迅激驟而  
睹之色驚稍扣之汨汨乎無餘味焉何者數先生一於  
饒古人之精而世學士大夫猶未免掇古人之華也饒



精者盛世之文掇華者季世之文今之文吾何敢以季  
世待之然其視盛世何如哉故曰余讀華泉先生集而  
有世道之感焉先生集舊有本歲久而蝕又遺所為文  
不載余理濟之明年從先生仲子搜得數十篇因敘入  
集中為重鋟之匪徒不朽於先生之詞且俾論世者有  
所考鑑庶幾慨然而興先進之思云大名魏允孚序



欽定四庫全書

華泉集卷一

明 邊貢 撰

詩集一

四言古體

顯陵五章送嚴介溪宗伯

於穆獻考叡哲維則宅茲郢方以蒞王國篤生我后膺  
符受歷奕世丕承下土是式

滔滔江漢翼軫之墟我后龍翔奄正中區誕基駿命聿  
紹鴻圖赫赫明明肇闡徽謨

帝念孝思繼序不忘位號既崇復我天常有嚴新廟祠  
禴烝嘗是典是彝誕告多方

乃命司空伐石京師薈薈我陵大建厥規載經載營竹  
花卜釐立極考度備物多儀

帝屬其文經緯七曜貞觀崇封勒我純孝億萬斯年湯  
孫是詔天人肅肅衛茲隧道

隰柳壽林母也

隰則有柳原則有桤顯允林侯母德且壽母壽維何七  
秩是望母德維何婉古敬姜

殷殷其雷在山之陽侯政有聲聞于東方匪維東方四  
國是揚母心則閒母體則康

體之康矣鬢之黃矣我侯燕喜家之慶矣於百斯年錫  
福之無疆矣

二章章八句一章章六句

朝涉篇

朝涉美孝子也陳大夫仕為御史贈其親感而悲焉風人美之故作是詩

朝涉洪流夕步江皋凱風吹衣游子心勞  
岸則有藻江則有魚我釣我採薦之中厨  
昔曳里布以獻以舞今也則亡敢曜斯組  
繫祭五鼎厥養迺三祿不逮存哀哀孰堪  
上塚蒸黃下塚回首嗟嗟游子行役已久

曖曖暮光蕭蕭白楊永懷二人曷也可忘

六章章四句

圃田詩

有序

洪隱君者歷下人也有用世之才而不樂於仕仕且及曰吾弗仕也戢居山東習治圃焉予之不見者十年矣日往來於懷思一見之而竟不得也今年春有客自山中來至京師至京師未久也乃歸山中曰洪子之懷子也

卷一  
甚甚於吾子之懷之也吾歸矣子盍有言乎  
予曰有是哉洪子之為移文調我也則幸矣  
作圃田詩以美之

圃有田田田兮宜我碩實連連兮

圃之中兮有田可宮我構斯崇維柏維桐曷以弗永終  
圃之周兮翼翼盈我疇兮疇有秋兮曷其求兮

一章章三句二章章五句三章章四句

泉之濱哀隱士也



泉之濱兮白石磷兮以飲以濯育吾真兮  
泉之澍兮錫之土兮載濬載渠溉之溥兮  
人之墜矣泉之匱矣瞻言跂兮衆之喟兮

三章章四句

山之陽送朱子宜歸省

三章

山之陽兮有春者暉草之華矣將子言歸  
山有泉兮瀟瀟其流子之歸矣誰與我晤遊  
子之歸矣登堂壽母何以贈子曰有春酒

五言古體

次韻題豫齋扇

適意無多言一笑成莞爾我心寒沙月君心古潭水莫  
作江上波隨風夜中起

送別台峰

皎皎中庭月照此離客顏月沈會有升客去何當還采  
采園中瓜裊裊不可攀草木本無知枝蔓相鈎環如何  
宦遊子岐路長間關散如蓬逐風聚如雲在山聚散本

莫期母嗟涕潺潺

茗嶼

滑滑海氣白楚楚衣冠聚誰開高輿靈太尉體光貯緬  
仰世則公樂茲清茗嶼

盤谷

佳氣何盤盤松柏叢林壑上有大宗祠棠棣華繁鄂始  
自一人身分此千萬絡

宗會廟

金匱山志卷一  
廟貌儼生存安靈綏後祿水木有本源十輻同一轂四  
百餘年來因之序昭穆

時思堂

蒼涼海日曙堂下森蘭玉願言永孝思俎豆差繁縟歲  
歲薦烝嘗采蘋清澗曲

環翠樓

樓前塚累累隴上麥青青島霧開遠岫海霞明空庭夜  
半松聲作淒其不忍聽

延月軒

松上有海鶴松下有泉石軒中几格明軒外狐兔跡延  
覽興遐情半窓山月白

望雲亭

威沸此檻泉脈自龍湫來飛出兩白龍劃然丹壁開倚  
亭望長雲從天噴風雷

世紀田

朝耕高奧田莫耕高奧田  
粢盛戒清酤伏臘擊肥鮮良

哉古人意以此奉周旋

觀蘇門山圖

昔予祇皇役弭節蘇門山展眺孫登祠薄暮松扉闌淒  
風振林木颺颺流區寰如聆長嘯音來彼白雲間又如  
見青簑囊琴弄潺湲緬懷沈冥志上與沮溺班一別期  
再遊欲往途路艱臨圖起遐想佇久忘還

再遊石門洞

蒼然郭東山百丈縈青碧石門忽中斷窈窕開仙宅遙

窺日月深却轉煙霧隔中天屹樓居星斗掛几席芳巖  
眩綺繡叢巘圍蒼壁山鬼不避人驚猿嘯窺客披榛上  
孤亭奇觀壯心魄窮崖倚天懸瀑水半空射高流橫雜  
珮直下垂疋帛分作四山喧散為千頃澤初冬天未寒  
晨曦映嵐赫重來意彌眷獨徃任所適信美愜心期胡  
為老行役終然脫塵網高舉凌風翮

送王內使敬夫歸省

以萼甫詩燈花開赤  
焰喜鵲報清音為韻

歸驂慕鄉土欲止不可能朝發華陰祠日夕過灞陵風

林散輕雨山店明春燈忽憶舊時路別來如更增蠨蛸  
綴簷牙遊子行到家鄰里登牆頭顧望紛且譁堂前列  
車馬堂上生光華何以為親壽宮衣明繡花草堂近終  
南采蘭日往來兄弟各相勉行歌咏南陔親心日以悅  
親顏日以開閒時語家慶笑指庭中槐春潭水烟青春  
岸杏花赤宛轉沙上徑依依記行跡濯纓清淺流還坐  
舊苔石鷗鷺了不驚遙應識歸客春分酒初熟香滿青  
門店匹馬隨雙童穿林復經軒夜窻清夢裏花筆生彩



焰好是南山靈相尋索詩欠我思何所在乃在樊川注  
斜月照虛梁微風動芳芷悠悠抱沈念脉脉感前喜尺  
練難重持春冰限雙鯉君陂水多魚我湖山有鵲一飛  
與一潛各自相娛樂同遊京輦下十載鎮如昨昨夜問  
君行朝來宦情薄君才比天馬高躅不可蹈我心寔亡  
羊多岐賴君導關山一為別輪軫何時到感激木瓜篇  
瓊琚愧相報枕書卧南窓月黑燈不明遙夜無近夢深  
交有遐情鳴琴寫幽懷調苦絃亦清曲罷不成寢高林

啼曙鶯秣馬西送君行行古城陰長亭短亭路千里萬  
里心春綠變山草連連岡與岑歸林渺烟光彷彿聞車  
音

送陳文鳴

鬱鬱深澗松冬夏不改青濯濯江柳花隨波化流萍羨  
彼五陵客終朝宴芳腥三楚多秀士皓首窮六經誰  
為尺一書薦之升王廷

達人徇高義立志不苟同長嘯六合表傲睨一世中君

看今日顏不及昨日紅  
乘運各努力揚休樹德風  
顏年儻相值跨鶴蓬萊東

次何遜落日泛江贈魚司馬之作奉送劉美之  
相投已盡簪相贈還留帶  
昨暮長安西今朝苑城外  
誰言車馬地復得須臾會  
會君心暫悅去君心轉切  
秋岐蔓寒草隱隱烟不絕  
歸鴈影聯翩墜葉聲騷屑  
端居尚興感況乃萬里別  
桂舸汴江湘何時到蠻泖  
蠻水夜悠悠月明登郡樓  
幽蘭翠縈渚紫蘅香繞洲  
應歌楚人詞

坐惜勛名浮

美之席上限韻送別二首

惻惻重惻惻當歌忽成默客車駕雙輪欲挽不可得華  
燈粲宵焰殷勤照行色月轉庭榭光風起簷樹黑誰能  
理朱絲為鼓長相憶

悠悠清川波矯矯風林翼翼飛邈難止波去何時息憐  
君萬里行莽莽天南北罹紛有孤操涉遠無近力不見  
寒松枝歲晚青更直

賦得將有事於西疇送王中丞致仕

發春驚蟄始土脉動淵泉時雨宵既零浮陽藹平阡風  
興飾耒耜驅牛登廣原竭茲畎畝力感彼農父言穡事  
依東作天時易流愆南鄰有逸夫日晏高枕眠四體苟  
不勤何以窮歲年

送王叔武使河南便道省覲二首

黃河三尺雪冰厚不可解使君白馬來青雲見風采蕭  
蕭梁園竹秀色遙相待鄒生與枚叟借問今安在日暮

登吹臺含情向千載

奕奕明農堂脩楣耀晴彩堂前春草綠堂上春雲靄遊  
子日下還宮衣試新綵夕膳飪鮮鱗晨羞薦芳蒹何以  
祝親壽如山復如海

章氏園餞別升之分得木字

中園飛雨過逍遙散遐矚青雲蔭華櫟迴飈撒炎燠百  
卉何歲蕤芳菲鮮如沐駕言贈遠人采采溝中綠遲回  
未終極陽景沉西陸歸驥嘶長林翔禽鳴高木感物多

所思褰裳以躑躅躑躅不可留何以慰哀曲

送王盛

朝辭雙闕下暮抵三河宿古戍早鴻稀荒城寒草綠上  
官山吏拜行縣村童逐冉冉松間亭何人伴幽獨

秋郊別意為汝南孟翁補作二首

驅車循廣術言返故鄉縣晨光一何綺熹微散秋甸宛  
宛墟曲中盈盈露華泣因之感遊寓物候倏已變豈薄  
骨肉情遙重桑梓戀

桑梓在何許藹藹汝南村綠叢帶長薄清川映柴門言  
別上春時當秋始來還未黍一已獲膻膻見高原落日  
樵牧歸涼風散雞豚登堂見鄰叟呼兒具盤飧依依丘  
中情款款醉後言即爾足為樂安用乘華軒

別劉子二章

文車駕四牡迤邐度層阿伊人秉朝憲結綬辭承華飛  
龍御宸極期運亨以嘉甘霖雨九天皇澤被幽遐顧念  
囹圄子累累誠可嗟憲章苟不渝殲戮豈在多行哉布



天惠庶以和邦家

昔我二三子弱冠登皇朝並跡協蘭芳聯翩振華鑣  
朝出長楊苑日夕憩平臯逝矣終遐月綢繆以逍遙  
顧子邁南江劉侯踰上郊嘉好一乖別馳光倏飄颻  
臨川睇浮雲結思如迴潮

次韻贈李子行之如陳

迢迢阻歡宴戚戚傷離居離居結中懷鬱鬱慘不舒  
若人美無度貞抱沖以虛朝為同朝客夕暮隔林墟  
林墟

金步尺 卷一  
積秋霖流潦不可除四野晦蒼蒼行行安所如驅馬臨  
大道瞻顧空踟躕

奉送大司馬華容劉公致仕二首

藹藹東山雲覆彼山下堂乘時播皇澤從龍彌八荒八  
荒遼且邈下上以翱翔龍逝鼎湖陰雲歸故山陽何以  
慰蒸庶私衷鬱彷徨

草堂何所有有蘭復有芝采采山之側飛仙相與期寄  
傲雲霞間可望不可追抗手謝城市去去從此辭徒遺

高世風永繫來哲思

為楊子賦別母詩

青驪載華轂宛轉度秋坂母氏遠別離客子心繾綣行  
行采芳蕙緣陔復循畹山風夕飄飄吹我車上憶車行  
不可返母去日以遠何以保黃髮對子加飡飯

追送宗之憲副不及

臥疴起恒晏出戶客已行征車揚素塵窈窕踰層城行  
行遵故轍阡術縱以橫望望不見君悠悠傷我情清川

迴白日可以鑒中誠

送沈仁甫歸省二章

瞻夕臨廣郊歡宴良須臾之子駕言返高登鬱踟躇不  
惜形影濶所悲歲月踰三江曠綿邈悠悠限東隅征途  
慎所須願保千金軀

品服耀有輝班裳以謁之桑梓誠可戀道路安足辭馨  
羞潔甘旨爰以隆孝思徘徊膝下歡婉孌及良時修齡  
欲有祝永與南山期

元夕致仁宅詠燈送別

佳辰逼元夕宴語春雪餘梁燈一何豔  
流光照離祛燈燼可復燃祛解難重挈  
盈盈江上心感念成歎歎相看已不極  
相憶當何如

贈王文熙五首

陽鳥流歸音空堂春風早居人結遠夢  
行子就長道雞鳴東方白整駕何草草  
歎息素冠詩繁憂滿中抱

總轡城東門綵綵行子輶郊原茂時卉  
林薄鳴春鳩登

高眺連岡川途邈且脩俯睇川上波泛泛鳬與鷗一為  
離群感淚下不能收

昔子往恒山倉卒不我辭竭從恒山至輦經何累累素  
室曜朱火哀哀讀喪儀一讀一長號再讀聲轉悲咄嗟  
荼苦心逝者寧見知

逝者為何人寔惟子先公往昔泣吾土藹藹多仁風土  
人至今思譬若考與宗梁木一朝毀傷哉吾道窮對子  
攬長涕誰謂出無從

平居恨迢遠卜舍依我廬如何別我去三載天一隅留  
之歎無因欲往路崎嶇形影隔參商托彼雲中書不如  
斯須立暫得話踟躕

再送文熙二首

夜久河漢橫春堂別燈黯風淒鳥初動露重花猶斂明  
發不在茲重闕為誰掩

離言不可聽離怨不可書一日比三秋茲言良非虛江  
深雲木遠去去將焉如

送縣令代劉永寧作

南邦有佳士淳樸君子風登朝十年餘墨綬猶在躬維  
昔治莆日化與由也同監司匪宣尼誰哉賞其功再命  
涖恒山冰心晚彌篤予慚舊令尹有政不可告驅車薊  
門外把酒燕臺曲大道坦且直一試千里足

贈何邦彥

花林霽宵雨柔碧光離離美人駕行車迤邐雙輪遲輪  
遲無終極親愛從此辭何以結綢繆玉瓶金屈卮浮雲



暗長路奄忽天一涯窮谷多狼豺水蟄虺與螭客子戒  
遠道行行欲安之

行行欲安之肅肅持邦刑藉藉于公譽我我高漢廷君  
心如列宿照野何晶熒又如日在空皎皎懸丹扃豈令  
囹圄子惻惻歸沈冥

別熊子三章

驅馬陟前阪惆悵送子歸良晤未及終車徒忽已違陰  
風蔽天地砂礫慘陽暉葵霍不自謀衆禽相與飛五里

金史卷之八  
卷一  
一反顧十里一徘徊徘徊不可見淚下沾我衣

車徒去彌遠言駐澧水陽婉孌諧二親春暉麗高堂堂  
下班馬鳴意氣何揚揚暮甘復朝旨為樂良未央嗟彼  
時役牽關途遲翱翔

翱翔適嶺海路衢悠以長車前建隼旗車後擁干將擊  
獸須擊虎刈蕭無及芳丈夫志萬里遐遠安足傷顛顛  
霄漢姿皎皎冰蘂腸勗哉保終譽慰我親故望

別湯子五章

關途鬱迢遠卉草青已發驄馬何駉駉向風鳴不歇廣  
隰流春霏層岑翳圓月遲迴去不忍引領望京闕

京闕邈難覩萋萋蒼樹林沈沈天宇夕靄靄浮雲陰丈  
夫萬里志烈士千古心鳳鳥久不鳴誰哉繼其音

彈子匣中琴寫我心曲悲我悲良自諳子琴知者誰不  
惜去日早但恨來日遲何當假羽翼送子川之湄

驅車井陘谷揚旆汾水流翱翔覽四極迢遰陟崇丘遐  
陬歷巖巘幽訪浹原疇勗哉利爾涉風湍寡行舟

喬木多勁柯直流無反波哲人秉孤操孰云光可和嗟  
彼黃雀吟感此卿雲歌悠悠向原隰惋惋將如何

吳將軍巡關圖

戎馬歲南牧漢軍勞北防軍情異主將冷煖須共嘗朝  
出潮河川暮過古北口邊烽傳羽箭朔氣嚴刁斗月下  
黑山晴分明見列營霜欺征袖薄石報獵蹄鳴三軍晏  
然睡我亦倚吾枕天子不可驚長懷亞夫寢

清白傳家卷為劉安之題

清如渭川水白如太白山邈爾清白人遙在山水間至  
清不可清至白不可涅傳子復傳孫一心如一轍山同  
今古色水同今古流清白苟不變山水同悠悠

題白巖畫松圖

古松何童童獨立難可羣歲暮倚冰壑偃蹇凌蒼雲脩  
標有遠蔭直幹無曲文匠氏苟不遺寧避斧與斤

題楊氏所藏畫

翩翩水禽飛灼灼水花亂柔艷雜幽聲紛紛滿芳甸悠

悠畫中意潑潑天機新彷彿曾遊處江南二月春

題畫

空江夕烟斂日色沙上明輕漣漾蘭楫嫋嫋秋風生白  
雲滿層阿林光帶高城姬文去已遠詎辨垂綸情

題放鶴圖集陶句

野外罕人事靈府長獨閒登陟千里餘晨夕看山川  
川一何曠亭亭月將圓雲鶴有奇翼一盼周九天但使  
願無違甘以辭華軒念之動中懷放意樂餘年吁嗟身

後名百世誰當傳

答顧華玉見懷之作

離腸如車輪萬轉不計程  
咫尺阻言讌何殊在山城  
閒曹事稽纂文墨紛相縈  
不見馬上人空聞馬蹄聲  
攬衣步幽閨脉脉牽遙情  
屋上春鳩啼樹杪浮雲行  
坐惜韶景暮江臯芳杜生

贈徐子

丹棗何累累朝日耀其光  
上有同林鳥飛飛鳴且翔  
行

子遠于役攜手登河梁舊京渺安之江永衢路長戚戚  
里中語依依川上情駕言往相逐無舟何以航乖離去  
則已但使心無忘

贈友

春陽初獻歲芳樹日以青送遠及近郊何由申我情我  
情方鬱紆君駕不可停瞻彼飛鴻翼聯翩共遐征奕奕  
雲中河爛爛川上星中願渺難遂佇立以屏營

醉中呈時大親丈



憶昔別丈人倏忽八九春往年雖暫逢契濶無由伸寒  
冬陰氣固微陽照廣津送送不及遠千里空勞神今來  
芳草時言作上國賓青袍耀垂楊移家住京塵吾親適  
試吏相過無昏晨見母復見姑此樂難具陳佳辰展良  
讌味寡情則真相顧各躊躇何以序情親醉別勿草草  
揮手天涯人

逆旅中會同年杜子廷獻因懷其弟廷陳省元  
凄然增感

月缺還復盈木枯還復榮如何泉下客一死無重生芳  
筵列時彥栖栖見遺兄昔同賓薦來雙壁價連城今為  
失侶鴈徘徊哀且鳴存亡一興感四座盡沾纓孤墳背  
山郭宿草萎以縈死者亦何知綫茲骨肉情長歌欲相  
慰彌使心怛怛

維洛美劉子也劉子仕洛為大夫作室以奉母  
君子名之曰榮養風人美之故作是詩焉

維洛有崇堂宛與伊闕京層構何崔巍仰觀浮太清青

雲結懸牖丹霞麗飛薨雞鳴事甘旨爰以隆孝情定省  
日在茲致美良匪盈嗟嗟宦遊子百世以為榮

榮名本天爵匪直耀圭組之子仕京洛膏澤被遐土膏  
澤被遐土皇鑒亦孔昭烜烜循吏稱洋洋流漢朝寔維  
慰母心居處良逍遙

逍遙復容與降陟在斯堂萱草雜杜衡羅生前後廂循  
基撫嬰孺登俎挹華觴俯睇洛川流顧瞻嵩與印優哉  
樂相樂千春壽未央

奉贈少司徒華容王公致仕

大谷霽長霖迴雲媚山澤流潦豈不廣孰云泥吾軌朝  
謝司農卿夕為岳陽客皇眷良在茲行止各有適有適  
非盤教眷言反初役解彼府中綬歸我湖上宅葺宇依  
清漣躋山憩立石幽棲謝生慮靜便終日夕矯矯雲際  
鴻誰能制其翮

贈閻允中

郊月隱寒樹喔喔霜雞鳴翩翩隨陽鳥悠悠憚遐征客

車履晨發迤邐踰層城清川帶長薄綠蕪萋以榮江路  
東南馳行子慕脩程金陵帝王宅佳麗夙遺名吳觀雷  
岵嶢晉丘亦崢嶸憑軒一迴眺千載有餘情

伯川子仕為地官大夫能其官且有顯陟矣一

旦思其母夫人解印綬去予知其必有以也取  
六義之比賦有兔詩二章以美之

有兔何爰爰宅我中谷阿中谷一何邃山石鬱嵯峨  
篁蔭清風秋鞠揚其華于偃復于息為樂將如何

月明流夕光零露白湛湛飢食野田草困息山石陰物  
性有固然衛生良已深不見虞人置肅肅施中林

答石峯見懷之作

斗柄當西南河漢東北傾零零露華白晶晶天宇晴微  
風度廣陰熠燿時復明卉木日已黃秋氣日已清念子  
理素瑟苦調多離聲嗷嗷失侶鴈汎汎隨波萍會合固  
有期此際難為情

露井梧桐凋杳杳秋夜涼眷言懷美人展轉何能當

纖月掛西牖微明照我床皎皎瓊樹姿寤寐如在傍近  
離已不堪况乃途路長誰其縶子馬慰我心彷徨

寄弟賦

憶爾別我時日照河邊柳痛哭別我去上馬猶回首知  
爾愛我心不殊足與手徘徊望行塵佇立沙上久  
弱弟復多病相思傷我神爾須為孝子吾已愧忠臣膝  
下三春夢湖南萬里身晨昏甘旨暇休對說烽塵

戲簡王臨安同年

候子虎溪渡送子龍陂橋出城不相見征蓋脩已遙百  
金買江魚千金買春酒期子會宜城飄忽過潼口追子  
漢江曲望子峴山頭子有室家好豈知途路愁暮投城  
外寺急雨響高屋安得與子同長歌對銀燭子程勿早  
發吾駕亦早留風塵莽南北一別動經秋

右揆鄒公由齊入閩齊人有華泉子者與公友  
抱病不獲出餞作詩以遺之

懊惱復懊惱雞鳴一何早病夫掩關臥遊子就長道娟



娟窓中月照見窓下草室邇人遂遐離憂坐堪老

黃鸝鳴樹顛嚶嚶求友聲佳人遠言邁牽我幽思情思  
情何綿綿綿綿復縈縈出門望軒蓋道阻不可征靄靄  
山氣浮晶晶川雲平鴻鴈方北飛誰哉達中誠

華輶耀朱旆宛轉凌春山朝辭鄒魯鄉暮過梁宋間美  
哉南邦化夢寐開心顏丈夫四方志車馬胡暫閒綣綣  
東人懷何時復來還

榮恩介壽詩為陳矩菴中丞迺翁作

中年謝簪組將以遺世榮晚歲沐崇恩封誥來承明金  
章既輝霍鴈冠亦崢嶸升拜天子光閭里咸震驚悠哉  
顯揚志爰畢遊子情

白雲何飄飄覆彼白下門遊子限江郭登望窮朝昏孰  
云三品崇能報罔極恩休光燭遐土膏澤被元元庶以  
立脩譽永播乾與坤

乾坤蕩無極客子日行邁永懷將父吟陟岵發潛睨閒  
登楚丘望長川皓如帶高榭鳴涼蟬秋風起江介煙中

樹如薺隱隱見吳會

吳會有高樓上切星與斗北牖臨玄湖南窓對鍾阜樓  
上一老翁皤皤垂白首服食皆烟霞圖書是賓友雖為  
中丞父何異商山叟誰歌難老篇願以祝眉壽

貞壽詩

水上雙鴛鴦一失無再偶良人棄妾去白髮閨中守竹  
老有古節松老無柔枝戕戕我青山石萬古色不移誰為  
貞壽歌請君歌此詞

金匱要略卷之八  
賦鶴翎扇壽江翁

白羽白且鮮製如秋月圓青雲相與媚皓雪避其妍  
入仙翁手逍遙以蹁躚招彼蓬山侶乘風下芝田萬壽  
同所歸飛飛凌紫烟

劉克柔迎養二親乞詩為壽以人生七十古來稀

七字為韻

人生有良願莫如翁姥健生兒無令名雖壽安足榮七  
歲燕山道重來見秋草十月到官衙蟬肥霜菊華古稱

遠遊苦今知遠遊樂來去何翩翩雲中度雙鶴稀年具  
慶稀勿輕萊子衣

西臺遺恨為吳克學御史作

晏眺當沈暉南山正巍巍孤子天涯心邈與哀鴈飛鴈  
飛各有止孤子心無依念彼堂上親喬年鄰古稀經時  
客梁宋苦恨溫清違何知變故來繡服更麻衣整駕返  
初轍洒淚臨江圻人去秋堂空淒風吹總幃嗟嗟宦遊  
苦不似前時歸

金方集卷一  
稽勲馮子佩歸治祖墓

油油上谷路颯颯秋風起落日客子歸寒烟滿墟里墟  
里夕燈明臨堂哀淚橫無復報劉日空陳李密情攜兒  
負畚鍤自關山中土坎坎徹下泉雙棺閉幽戶幽戶不  
重開向山高築臺他時華表上應見鶴飛來

城東尼寺哭妹三首

佛居峻且立中有嘉樹林驚飈墮其芳柔葉垂廣陰青  
陽詎能幾朱夏奄相臨一為生死哀感我涕盈襟

生為同胞親死為異域魂魂升不知返親斷有餘恩列  
几陳羞飯芳醪湛空尊陰風吹薄帷慘慘白日昏徘徊  
復何見惻愴難具論

平生處閨閨不識門與遠孤魂蕩幽邈廣野將疇依舊  
國踰山河反葬路逶迤寥寥禪宇空疊疊芳序移死去  
長已矣徒令生者悲

次東卿韻輓北村秋官

昔我師事公公以我為友長安車馬地相從十年久如

金匱方  
卷一  
何永潛翳冥卧西山畝敢謂涕無從離離滿衣袖

喔喔雞亂啼皎皎月在牆立馬古城下長歌盡餘觴咄  
嗟霄漢姿今返冥漠鄉

公昔較我藝弱冠舉於鄉公子復青年探花冠羣芳浩  
蕩雲中衢接羽相翱翔思公不可見斷絕我中腸

我才疎以拙應答多後時長懷隴頭吟負公十景詩公  
今卧泉壤隴樹生新枝何意述德篇翻為斷腸詞

昔公謝病居坐卧釋子牀藥物雖見親書帙猶在傍中



宵激昂志江漢相與長哀哀七尺墳漠漠春蕪荒

經西湖

皇園寂脩夜馳路直且長玄湖貫其北流水何湯湯  
冬寒氣交原野下微霜衆芳各以萎鴻鴈哀南翔俯視  
清川波仰看明月光涼風吹我衣俛首思故鄉故鄉不  
可返攬轡止彷徨

天壽山行

石門凌旦啓馳路直且長青山白雲合四顧鬱茫茫蘋

藻秀空澗黍稷亦登場哲王敦孝理陵邑事秋嘗予本  
草野士謬職參奉常敢云俎豆嫻亦已閱星霜縈迴足  
墟曲宛轉歷岩岡蒸嵐侵我肌零露沾衣裳沾裳詎足  
惜鴻私難可忘

入罐石口四首

濯足秋澗水水寒清見沙凌兢不可渡碎石如狼牙童  
子欣慕晴笑指東峰霞

穿林復渡河佳興未能盡每當路窮處更著祠官引山

女何處來石上洗秋菌

西登鑪石口鳥道不盈尺連山樹如繡雲中日將夕不  
聞樵采音但見虎行跡

睥睨接崇嶺白處生浮嵐上有百尺厓下有千尺潭爾  
非秦龍子那敢窮幽探

庭臯

清露下庭臯蘭缸照虛牖幽人已復醉更酌尊中酒登  
登高城柝深巷鳴雞狗夜久不成眠倚闌看北斗

金史卷之八十二  
卷一  
西軒詩為襄垣府將軍作

朝光麗朱邸夕雨明綠芳陽休一何嘉顧眺臨西堂西  
堂鬱以邃杳杳塵務絕右圖復左史回翔盡髦哲宛轉  
膝上琴窈窕鄴中吟吟以詠我懷琴以宣我心淮南建  
黃屋梁王闢東苑侈縱匪不娛終以冒皇憲皇憲不可  
冒侈縱不可延美矣王孫德永茲黃髮年

七言古詩

分韻得岳字送邢侍御出按秦中

函谷關頭雞喔喔驄馬凌秋向西岳岳前石子何犖确  
繡衣侍者斧在握冠上神羊戩一角西抵龍荒北幽朔  
百二河山眼中邈渭水清清涇水濁須君激揚無憚數

贈陸文質歸雲間

橋西落日橋東虹碧烟黯黯秋正中九峰仙客泛槎去  
鶴氅虬髯吹晚風槎頭乞藥人如市共說神方能起死  
海上傳來語不虛青蛇本是龍宮子月光星影動銀灣  
河鼓天孫指顧間長安亦有君平肆莫避雲濤隔歲還

題程時昭所藏畫鶴圖

程侯手持雙鶴圖索我為作雙鶴篇高堂展玩羽翮動  
碧落青丘如眼前丹青爾何人天機入幽渺斷霞殷殷  
江日曉雙鶴如人立松杪跂者自跂鳴者鳴華亭遼邈  
緱山杳宛轉如思珠樹林蒼茫誰識九臯心吳王郭裏  
秋塵滿漢帝壇前春草深西山玉臺不可見東溟金竈  
已難尋吾想丹青人前身恐茲物華表歸來氣紆鬱五  
里徘徊月中宿不然形神安彷彿程侯程侯霄漢姿三

春作郡楚江湄休令怨嘆分行去化履升雲會有時

贈張氏汝吉汝誠兄弟

魯川何迢迢太行亦蒼蒼行人躍馬出門去何異飛鶴  
東西翔愛君此行飲君酒君家弟兄古未有夕郎清迥  
雕鶚姿秋曹盤礴雷霆手朝論同歸攬轡年家聲況是  
埋輪後青春衣繡下中臺山東山西花欲開休嗟羽翼  
經年別早喜陽和及草萊

送歆湖赴湖南提學

征旗帶落日出門君已遙層城不隔夢夜度盧溝橋盧  
溝橋邊山簇簇故人卻在城南宿誰令相見轉多情翻  
恨遲行不如速江漢風烟遲早春關山雨雪暗邊塵臨  
岐莫動殊方感予亦東西南北人

遊三巖洞

括蒼山叢紛阻脩我來處處歸冥搜南明雙屐始著地  
探奇又作三巖遊三巖三洞神仙府重門窈窕煙霞古  
山鬼終天護秘文巨靈何代煩神斧鸞驂鶴駕不可尋



飛蘿懸葛自陰陰  
揮杯獨酌巖中水  
一片清冰澄我心  
丹丘碧海尋常是  
嘆息終年在城市  
便擬稽生著絕交  
長向山中訪松子

題高幹畫竹

武陵豪士仙中人  
清和灑落無纖塵  
平生富貴不足道  
筆挽造化回陽春  
坡真可妙最堪惜  
老息森嚴露形迹  
鷗波亭外寂無人  
五雲山氣凌秋碧  
山氣凌秋勢薄天  
凝雲挾霧快騰騫  
巉巖峭壁幾千仞  
此士直欲窮

其巔從來能事不受迫醉裏蘭亭難再得東君此幅何  
自來千金寶劍連城壁枝幹依稀叢葉同天機妙解却  
難工就中一片飛白雨爛然琢玉寒玲瓏寒予最好蕭  
湘景見畫令人發深省曲處疑聞爽籟生深中似覺陰  
風冷半窓疎影和醉眠斑管春寒詩思牽玉蟬冷吸鷗  
鵠露文綃細簇玻璃烟却思鄉國頻相見自謂相求當  
不厭嗚呼豪士不可追何時為掃鵞溪綃

送董生歸四明

昔年見子黃浦上叉手向人持禮讓石麟天馬驚殊相  
今年見子披雲樓珠樹凌空劍倚秋乘槎歸作廣寒遊  
杏花香裏櫻桃宴草色羅袍碧於澱明年此地重相見

送秦用中文學

玉真臺下三間屋屋後有松前有竹廣文先生雙鬢禿  
長對青藜夜深讀有時不巾亦不服獨跨瘦驢攜短僕  
五老峰前看秋瀑有時芒鞋步江澳月落詩成江鬼哭  
石底流泉手親掬歸來煮茗窓下宿清夢蘧蘧謝梁肉

鳥聲墮枕猿掛木紅日三竿睡初熟食罷曉盤歌首肯  
為剪溪雲封尺牘長安故人勞遠目

送錢士宏監稅杭州

城頭旭光翻早鴉水部使者驅行車行車悠悠向何處  
未到行曹先到家行曹去家餘百里攜李西來岸如砥  
吳岫雲連越岫雲西湖水接東湖水鄂王廟前春草青  
蘇公堤上花冥冥炎州逐客應相別想見鵠原萬里情  
孺子宅送程南昌

豫章城南高士眠  
豫章太守榻常懸  
漢廷使者召不起  
土室蓬門江水邊  
江水悠悠朝市改  
故國荒涼宅安在  
墟里遙看變夕烟  
墓田誰為羞春蒞  
使君五馬雙朱輪  
露冕乘春意氣新  
下車先問南州客  
恐有當時下榻人

醉中贈王少尹

陽城少尹才且賢  
佐邑三載名流傳  
相逢盡道是青天  
惡少豪徒不敢前  
松庭人靜春草芊  
邑中老幼高枕眠  
政成奏績來日邊  
聲光赫赫誰能先  
冢宰見之呼少連

大書上考朝廷宣長安雪梅開早年手捧尺檄別我還  
城館寒燈開夕筵銀河掛窓山月偏欲醉不醉心茫然  
天明一笑上馬去他日重逢赤氍毹

贈尚子

意氣憑凌一當百關西儒生五陵客少年學書復學劍  
老大蹉跎雙鬢白門下諸生半賜麻閨中小婦猶炊麥  
布衣東來謁天子春日醉卧長安陌陌頭花絮夕紛紛  
瓊閣如天隔紫雲浩歌翩然却歸去眼底誰是平原君

壽許太宰

明公昔乘御史驄問俗直過東山東海底鯨鯢失巢窟  
草間狐兔無留踪明公今曳尚書履手握星樞正天紀  
詔草親勞主上裁蒲輪特為蒼生起白首兼持將相權  
中朝五福幾人全威加朔漠三千里身繫安危四十年  
明明衮職誰能補籍籍人稱仲山甫不獨芝蘭滿逕庭  
盡看桃李填門戶桃李陰陰壽域開帝垣西畔接蓬萊  
朝回欲致長生祝笑對南山歌有臺

輓聽竹山人


江雨夜合涼雲秋江翁騎龍上天遊玉棺沈沈土門閉  
江翁只葬江頭地江頭苦篁風葉老下有巾車往來道  
相逢啼殺感恩人淚濕斑花愁不掃斑花自濕人自哀  
江翁一去何時來烟波冥冥渺千里空托招魂賦湘水

吳將軍轅門夜宴圖

營門花發春酒香濃點駝酥炙黃羊美人嬌歌健兒舞  
蠟鳳啼風月當午高簾飛幙絲吹騰觴波櫛櫛梁雲凝



主人醉眠客不醒探兵枕戈戍煙靜



華泉集卷一

欽定四庫全書

集部  
華泉集卷二

詳校官中書臣沈 颺

中書臣劉源溥覆勘

總校官庶吉士臣倉聖脉

校對官編修臣蕭九成

謄錄監生臣朱文佐

欽定四庫全書

華泉集卷二

明 邊貢 撰

詩集二

騷體

山有雲贈閒翁也閒翁家於婺水之上既壽且  
康其子僉憲君宦遊山東以不得恒侍左右為  
恨客有為之作望雲圖者野史氏聞而感焉迺

援琴而歌曰

山有雲皓其光兮以飛以揚兮覆我翁之堂兮我堂兮  
日闕我翁兮在山雲朝出游兮暮來還視我翁兮寔居  
其間嗟嗟山之巍兮雲則永棲我翁之樂兮千祀其無  
涯

薛封君輓歌三章

沈寥兮江門公之逝兮鹿豕羣奔公今何居兮泉扃鬱  
幽誰與公兮遨遊

泉扃何有兮厚土綿綿上踣松柏兮下奠泗淵公宵處  
兮晝爾瞑洞神理兮睠千年

絃誦兮初嘗公漸兮四鄉綠桂兮青嶠有嚴兮公廟盍  
來兮慰我人懷兮

賈太史母太安人輓辭

中寢閒寂兮夕風以雨靈薄陰沈兮莓生於廡棘人返  
兮戀戀杳慈顏兮莫予覩厯庭宇以周望循園廬而撫  
膺攬堂背之故諼續雜還兮落英擷芳荃以為旨奠桂

椒以為漿靈偃蹇其至止但進拜兮彷徨杉輦兮柏輈  
文驪兮素旂啓殯宮兮山之阿送母氏兮永歸重曰茫  
茫厚土閔虞淵兮白曜迴光燭幽玄兮陟彼峻岷睇流  
雲兮神理超遙眇氤氲兮嗟予寡翼安彼遡兮窮祀剪  
剪悄終慕兮

野泉詞為郡守高子洲作

時以述  
職如京

野之水兮悠悠子不樂兮遠遊子遠遊兮要津悵子獨  
兮水之濱水濱兮躑躅泉瀰瀰兮波綠願從子兮九重

化霖雨兮隨飛龍  
飛兮在天膏下土兮吾泉與子歸  
兮泉之野以逍遙兮冬夏

樂府

君馬黃贈祝仁甫

君馬黃我馬蒼兩馬相逐君馬良  
君馬來自函關道我馬空山食秋草  
憶昔兩馬初學行長安見者神色驚  
魯垞驪黃未足論衛丘駉牝虛馳名  
豈料長成人少顧十年不踏天閑路  
逸羣翻惹太僕嫌騰櫪正中奚官怒  
以



茲流落在風塵南走荆梁西入秦自傷萬里汗流血誰  
道五花雲滿身棄置不須憐我馬君馬亦在鹽車下疾  
足由來控者難驕嘶自合知音寡吁嗟君馬天下無且  
向沙場暫秣芻北來司馬今伯樂肯使君王空按圖

杜蕢

曠飲調飲臣蕢亦飲酒生微波天風凜凜子邠不樂君  
臣始終爵亡言存千古無窮

紀叔姬

國亡君亡吾將何歸父母邦魯先君壠鄒歸不于魯而  
鄒是依烏乎賢哉其紀叔姬乎

石祁子

冠珮則兆吾弗敢知吾所知者吉凶異儀或兆或否偶  
邪非偶大哉禮云臣子常守

四友亭詩有序

序曰鎮江之墟有亭峙焉左松右竹前梅後  
柏許氏四兄弟之所居而友之者也松友伯

馬竹友仲焉梅友叔焉柏友季焉是蓋齊堅  
普貞異體一情者矣昔姜氏以同被為懷田  
家以感荆再合薄俗敦焉古今人豈異也路  
遠靡致高風難挹爰徵厥好聲為四詩雖莫  
助於友于要亦無辜懸慕云耳

伯氏曰我所友兮在徂徠直榦矯矯排風雷千秋萬歲  
倚崔嵬美人贈我雲錦青何以報之松下苓朝食暮餌  
通仙靈駕青牛兮凌紫庭

仲氏曰我所友兮在淇澳苦節娟娟樂幽獨千秋萬歲  
無剪撲美人贈我綠錦裾何以報之竹上茹朝飡暮餌  
勁且癯駕青鸞兮凌紫虛

叔氏曰我所友兮在孤山繁英燦燦開冰顏千秋萬歲  
倚清寒美人贈我素錦綯何以報之梅白華朝飡暮餌  
神精和駕青禽兮凌紫霞

季氏曰我所友兮在新甫銅柯蹇蹇霜皮古千秋萬歲  
辭斤斧美人贈我翠錦裾何以報之柏子仁朝飡暮餌

容色新駕青虬兮凌紫雲

迎神

陟嶢巖兮望九疑立雲濫兮靈御馳裸二女兮驂文螭  
飛蕙蓋兮褰翠旂沅湘兮無波涔陽兮際霞風伯兮前  
導攬槍兮後羅山有木兮木有松懷重華兮心忡忡椒  
酒兮鼙鼓逢神之降兮風颭颭將愉享兮君山之宮

送神

重華兮降歆湘君兮並臨來聯翩兮共御歸容與兮同

心假靈保兮陳辭鼓南風兮瑤音蒼梧眺兮極浦洞庭  
波兮風雨蛟龍蜿兮晝吟鸞鵲下兮群舞睇靈光兮不  
見切予心兮愁苦垂巍巍兮餘澤為霖雨兮下土瞻有  
嚴兮遺像願嗣續兮終古

唐夫人操為都立敬祖母作

白楊翻翻兮翳於墓門誓良人之不從兮孤曷與存瞻  
彼中林兮豺虎縱橫我室我安兮我孤我將嗟嗟孤有  
成兮我目則瞑兮

門有車馬客為顧侍御迺翁賦

門有車馬客云來自吳下相逢問丈人草服在中野中  
野何所有有園亦有疇青槐蔭君堂文杏為君樓樓上  
置書史下繫雙桂舟園中古松樹甘露降油油居人被  
其惠行者藉其庥阿兒冠豸冠阿弟登龍頭出入鄉黨  
間光塵滿道周崐山岌嵯峨湖水繞下流丈人樂相樂  
延年方未休

都義士

母存兒亦存敢以身許人母死兒可死兒志良以伸我  
宇舅葺我桑舅植我室我家維舅力我生有兒舅無  
子舅有急難我當死吁嗟乎國士之義義與秋雲高聳  
政荆軻俱爾曹

李將軍

李將軍七尺身丈八矛生來骨相當封侯錦袍白馬如  
流電一歲長安一相見不掃邊塵向朔庭空隨漢月歸  
鄉縣李將軍雄且英山東塞北咸知名嗣忠堂前世澤



遠且讀父書調母羹君不見長楊羽騎如雲集天子勤  
邊方好兵

周司徒

周司徒真丈夫直氣稜稜霄漢俱致君不作堯舜主拂  
衣歸卧山中廬山中卧今幾載鶴貌童童履聲在十書  
五疏招不回九重虛席空相待北來顏利西羌胡爭問  
司徒今有無乃知繫國輕重者不獨廟堂公與孤周司  
徒真丈夫

芝山操

有序

芝山也者丹徒許子之自號也空同李子為賦之辭有招隱之意焉夫許子者方秉憲以齊政簡書在躬其奚以及此也而商顏之歌豈其心哉於是齊人有華泉子者乃援琴而反招之作芝山操焉其詞曰

山之芝兮紫英遐不見兮我怵怵逝將歸兮以擷以烹  
曰以芼予親之羹

一解

適脩眉兮四翁日遊戲兮山之中

朝予望之兮夕夢其下盍反轡兮吾馬

解二子之轡兮言

反顧周道兮云遠氓之靡家兮皇不有儲嗟嗟子兮曷

寧其居

解三

雙清操

有序

承菴子觀風東土秉憲齊政厥聲孔彰覃思

藝林靡典弗究爰述三解寄悰七絃目曰雙

清操焉

臺有柏陰陰兮皇鑒在上昭臨兮

解一柏之陽維我之堂

我激我揚曷我人弗臧<sub>二</sub>雪斯川矣月斯淵矣匪淵匪

川維我游之天矣<sub>三</sub>

<sub>解</sub>

次杜工部秋雨嘆韻東希尹

睡起山厨濕煙白堆盤忽見紅螯鮮狂夫對此興不淺恰  
值床頭無酒錢簷雨霏霏暮聲急蓬頭獨倚闌干立  
美人可望不可攀閒誦枯魚過河泣

逕荃籬菊寒續紛半紫半黃花似雲若令此物混桃  
李雖有貞固何由分華陽老人頭半黑坐對幽芳三

金匱要略卷二  
卷二  
嘆息屈平元亮今不逢莫向西風論價值

吁嗟屋漏不可數四壁頽牆少完堵自緣物候近重陽  
怪底滿城終日雨城南山寺風且寒欲往只愁行路難  
伏枕高歌夜不寐床頭酒壺旬日乾

桐江水為王推官贈別

桐江水深幾許司刑來使旌舉夾岸垂青楊豺狼化田  
鼠洞江水不可泳以游司刑擊蘭楫駭浪成安流司刑匣  
中三尺鐵隱隱星光淬雞血鼠移巢窟龍失其波桐江

桐江奈樂何

車遥遥送錢伯川監稅河西

一車兩雕輪宛轉行不已悠悠河西路去去百餘里  
孟冬北風冽河水寒不流朝發城東門暮至河水頭誰言  
近別易近別心更苦咫尺不相看天涯在庭戶君行西  
河上幾日河柳春攀條采柔芳願寄同心人

洛陽道送劉少府

沃野萋柔桑翩翩春鳥翔使車天上來白屋回青陽青

陽為雨露不為冰與霜冰霜易流鑠雨露恩迺長誰能  
泥朱幘永庇嵩洛堂

車遥遥為前人賦

車遥遥風起沙蓬卷離腸逐雙輪輪轉腸亦轉雙輪轉  
轉臨大河雪花如席冰嵯峨孟津渡頭燈火亂洛陽城  
邊冠蓋多車遥遥載君行載君返赤鳳啣書下紫雲回  
期莫待春華晚

賦得萬里橋送客

萬里橋邊樹如薺蜀使入吳真萬里臨岐記取丞相語  
萬里之行此其始英雄一往人代易錦水湯湯鎮如昔  
遺陣空思雲鳥形脩梁已荒車馬跡旬宣使者家在吳  
入蜀今為蜀大夫登橋攬轡一回首慷慨能輕萬里途

運夫謠送方文玉督運

運船戶來何暮江上早風多春濤不可渡運船戶來何  
暮裏河有閘外有灘斷篙折纜愁轉船夜防蟲鼠日防  
漏糧冊分明算升斗官家但恨倉廩貧不知淮南人食



人官家但知征戍苦力盡誰憐運船戶運船戶爾勿哀  
司農使者天邊來

送劉約中之金陵

自君之出矣途長夢亦遙南風何日起吹轉木蘭橈自  
君之出矣長望石頭山山高望不極目送碧雲還君到  
石城邊應看石城樹樹杪百尺臺是儂行樂處

濟寧劉使君提刑晉陽過新鄉之墟其友人華

泉子者適游蘇門傷其別而不得見也於是

賦車遥遥以招之

車遥遥向何許去君咫尺地不得一相語憶昨與君遊  
大梁暑雲拂葢流塵黃回頭轉睩復幾日草木零落飛  
嚴霜山中獨行歲華晚烟留月綫誰能返逸客長懷阮  
嗣宗仙翁却弔羅公遠聞君五月登嘯臺何郎許子相  
徘徊酒酣清歌眺白日萬里颺颺長風來人生得此亦  
自樂何用苦教纓冕縛不見昔時賢達人強半遺跡在  
丘壑車遥遥將奈何太行積雪寒嵯峨我贈君七尺紫藤

杖並履閒尋安樂窩

臨高臺為謝內史題觀日圖時內史將省母歸

餘姚

臨高臺望三山曜靈出海光以爛浴咸池登扶桑羲和  
總綏六龍服箱回精白雲舍流采黃金堂金堂客子及  
秋返雲舍萱花凌雪芳臨高臺心不及朝懷親兮夕懷  
國却到江南望江北

題畫

散髮兮江阿曳青節兮裳薜蘿風颭颭兮鳴琴倚文石  
兮藉莎石畔兮何有有蒲兮與荷悅芳兮流目矢心兮  
靡佗匪人羣兮言絕慨新聲兮孔多

題王庭簡像

玄其衣纁其裳瓊琚玉玖鳴鏘鏘端而容肅而止儀冠  
戔戔若山峙主羣祀禮百神精明之德通天人上郡城  
邊無吠狗駿馬旃裘望風走李廣汾陽是其偶吁嗟若  
人古良守

題金谷園圖賦得綠珠怨

誰言妾命薄結髮承主恩誰謂妾身輕寵冠金谷園  
中桃李千萬樹對妾妍華避無處徘徊歌舞曲未終門  
外戰鼓聲逢逢當時只倚紅顏貴豈料紅顏為主累主  
家高樓天與齊妾身不惜委黃泥他生願作啣泥燕長  
傍樓中梁棟棲

築橋怨

橋之築人痛哭橋之崩人不行不行猶自可痛哭悲殺

我虬鬚環衛蟒服尊誰其坐者魚朝恩磚廠供磚石窩  
石役夫一丁錢七百五州十縣走登登前後兩年方告  
畢沙河橋千歲牢渴殺道上人旱殺田中苗願天不雨  
水勿高馬蹄踏踏橋土裂中有役夫膏與血

斷絃引

離琴掛幽壁玉軫朱絲絃美人不復來華月生秋圓臨  
除拭金徽絃絕軫難續昨日白頭吟今朝斷腸曲軫是  
美人繫絃是美人調人亡琴亦亡獨坐悲長宵

題豐內翰愛鳧樓

春鳧呼其侶拍拍戲芳渚一鳧忽驚人群鳧共高舉回  
翔集城下點點散如雨愛鳧古人今幾秋夕陽江上空  
高樓馮闌獨送千里目平沙莽莽寒煙綠

兩節婦為毛給事用成作

姑曰婦嗟爾芳齡始二九綠髮紅顏何可守婦曰姑上  
有姑下有鵜姑不舅負吾寧忍負夫婦姑相向中庭立  
抱鵜鵲鵲顙天泣天乎不剪毛氏宗白甘自舂井自汲

鵲生三鵲宗日彊更有小鵲如鳳凰苞羽翩翩被五采  
遠簪白筆登巖廊登巖廊心獨苦回望滇南兩丘土君  
不見貞女墓上木青青高入雲路人競指毛家墳

五雜組戲三平董兄

五雜組袖中綃往復還金翠翹不得已且逍遙  
五雜組佩瓊玖往復還捧觴婦不得已且開酒  
五雜組錦繡帷往復還城外岐不得已換行媒  
五雜組牀上裯往復還使者愁不得已正綢繆



五雜組富家筵往復還河上船不得已買花錢

將歸篇聞希尹有東歸之念作此招之

對面有乖絕千里長相思登高望來車入門賦將歸驚  
風何飄飄獸兔莽間啼羣鳥各有趨他鄉難獨依獨依  
令人感悠悠浮雲馳悠悠尚可道霜露墮百草

廬墓哀為楊名父作

廬墓哀廬墓哀墓上有花親手栽春風一番花一開親  
魂去矣何時來魂不來兒不返空林月落猿聲斷淚花

著樹花已空傷心何處吹羌管

銀臺墓為韓通政賦

銀臺墓蕭關路落日春草青蒼山起寒霧蕭關路銀臺  
墓墓前嵯峨石碑古下有雙棺閉泉戶夫為正議妻淑  
人四封三品俱皇恩先銀青後金紫生兒願得銀臺子  
銀臺功業何可知請向墓前看制辭

病婦行為惲功甫悼亡

妾嫁郎纔十五辛苦為郎立門戶舅喪未了復姑喪十

載牛衣一環堵薦書初下郎有名寒冬攜妾來京城可  
憐弱質犯霜雪春花一夜成秋零左攬兒右牽女淚濕  
枕花紅淒淒背燈語招魂須故衣埋骨須故鄉郎恩豈  
云薄妾命自不長解錢繫兒襍留市梨和棗拔釵穿女  
裳留作嫁時粧兒女勿啼郎勿哭喪車不反泉臺轂

嗟克明為段僉事惟勤迺翁作

孰謂弟無子兄子為後與子同孰謂天有知三子天以  
殤無後翻在躬嗟而克明為子克子兄克兄吳人至今

傳為吏公且平嗟而克明葬以一命服祭以五鼎烹有  
子官度支出典邦國刑鐵冠白筆紆銀青過家上塚泣  
所生以三尺孫嗣宗祊謂天無知天竟有知嗟克明

歸人哀為南海張進士作

歸人哀哀不極雙墓累累五羊側親顏欲見不可得夢  
裏相看畫中憶養兒謂言得兒力畫錦歸來掃荆棘百  
金置酒千金庖散作空山老鴉食歸人哀哀不極

接樹嘆為方舉人迺翁作

朝汲水暮伐土山人接粟山中圃白頭翁嫗感且傷那  
能更待渠實嘗春風花開秋結果玉盤跪進黃金顆冰  
魚凍笋古有之誰道蒼蒼不關我我圃之樹今十圍雙  
親何在塚纍纍山人見之雙淚垂

傳本學二親輓歌

夫荷戈妻辟廬渡江北來成京都京都主將多錦腴夕  
幙朝衙馳復驅恨不為君西擊胡四十二載空良圖大  
兒官至執金吾小兒廷評冤獄無諸孫亭亭俱丈夫興

來一飲酒百觚長歌激烈聲鳴鳴源溪冬寒水不枯笑  
將白髮歸黃壚翁生有聞翁不孤

歌行

席上贈子立內兄

碧柳毵毵黃鳥過城隅早芳媚雲波登高宛戀鄉思多  
玉壺倒盡難成酌欲留不留將奈何韶華荏苒空蹉跎  
攜手東陌上烟光忽已夕眼前相對不盡懽別後封書  
復何益君不見鳳雛短翮棲高桐驥子草伏山岳空看

君不合在岩穴上苑年年春杏紅春杏紅點春衣明年  
此日應相見千里家園亦暫歸

白岩公墜馬次杜韻奉呈

我本使君幕中客慣趨廣庭侍雙戟雨晴拂曉時一過  
齒齒屐痕開蘚石使君何所作白羽搖搖藤七尺使君  
何所好湘縹在床琴在壁邇來使君偶墜馬十日不踏  
長安陌芳英落盡春已晚影倒青林日光射君不見少  
陵老翁亦傷足猶對驂騑歌噴玉又不見漢庭司農不

受辱自比轅駒悲局促人生須作壯士豪安能蚩蚩等  
胥僕城西有山如少室城南有村如杜曲映水岩雲鎖  
翠微隔花山鳥啼蒼竹君須乘興我須馬磁甕滿載春  
缸綠酒酣拔劍共起舞詩祟病魔齊就戮

贈東山謝萬戶

萬戶侯丈八矛臨川四境俱休休萬人督千鍾粟臨川  
四境俱鼓腹壯有立老有歸英巨峯前春草肥白頭高  
眠草堂下前植青松後梧櫟臨安路與臨川通共道將



軍多祖風有姪如玄子如琰不獨東山別號同

守郭老先生進階三品寄賀長句

朝賞冶城花晚折長干柳邂逅相逢太史君

守郭子也

逍遙

却憶程番守程番老翁垂八齡頭顱半白雙瞳青看山

遠步時忘返中酒高眠日少醒昔在先朝歲庚午投荆

自愧分銅虎翁壽纔交六旬一我齒恰當三十五忘年

結好心綢繆峽月巴猿兩見秋弔古同尋庾亮宅懷鄉

並倚仲宣樓那知世事多遷變倏忽還如零雨散金紫

翁方拜國恩衰麻我適遭家難家難述遘涕淚餘傳經  
重駕法臺車蘭陽夜火黃精飯汴水春風錦字書問翁  
北歸今幾載可念江陵舊僚窠太史遙從故里過里中  
爭賀新銜改新銜故里樹新坊白日門庭綵繡光岳峯  
蒼翠河流曲暮景優游共短長

賦得江上草贈燕泉何子南歸

江上草何青青使君歸來朝戴星問君君不言挽君君  
不停十丈風帆疾於矢蒼梧風深竹花紫雲中之君呼

不來空餘淚滿瀟湘水瀟湘水清且漣江頭瞻望不可  
及惟見草色呈芊綿請君細鼓南薰調日對虞皇發長  
嘯

賦得泰伯祠送龍致仁僉事

萬乘尊如浮雲髮乎可斷身可文弟有雍孫有札百代  
清風見家法牲牢膾黍稷香帛烟裊簫吹揚使君祭掃  
廟門掩陰風颯颯靈旗颭

送錢伯川歸錫山

曉上黃金臺夕登潭柘山白雲何油油下覆鴈門關愛  
君此行為君羨白頭阿母今相見我身欲飛無兩翼杳  
杳風塵隔畿甸君家堂前二古松枝柯偃蹇如虬龍南  
窓恰對梅花塢西牖全當天井峯伯川之水舊姓吳川  
上山形列畫圖昔稱讓國今稱孝乃有地曹錢大夫大  
夫今為返哺烏登堂壽親親不孤棄官就養人所無誰  
言大夫已矣乎古來廊廟須江湖

送周公度下第

征駕嚴曉裝行行及春陽離心曠幽邈如彼江路長江  
路長雲漠漠東樓歡笑一迴首十載高情鎮如昨先生  
負奇氣曾次何磊落平生自許梁棟材國門未築黃金  
臺敝裘長劒慘無色可憐五上空歸來空歸來勿淒楚  
君不見齊無鹽今日椒房貴昨日採桑女又不見商傅  
說朝辭版築暮霖雨人生窮達會有時世間俗子安得  
知

送陳嘉言經畧赴陝

前年使長江南今年使長城下使君自有開濟謀不在  
舟航即鞍馬馬行萬里道君抱萬里心二月春草短雲  
愁沙磧陰長城路通咸秦古來轉餉多名臣後有李唐  
前有漢君不見蕭何與劉晏

送沈仁甫歸省

瓜洲渡三江路客子將母心湯湯水東赴水東赴送客  
江上還前年奉觴衣白鷺今年奉觴衣白鷗子階日以  
崇母心日以樂樂在平反多豈論官與爵君不見漢家

京兆雋不疑母子聲名天下知

送少傅劉先生祭掃歸釣陽

夕霖清上郊朝日麗層漢傾都車馬出載路行人看元  
宰辭掖庭翱翔下東觀東觀逶迤複道長涼風飄轉賜  
衣香天曹舊識尚書履秘閣新加學士章秘閣天曹俱  
要路一代人才真有數御史中丞次第遷總戎司馬從  
容步謬謬危言震百僚巖巖師表重三朝啓心不負天  
王托破膽猶聞北敵謠畫錦歸來故鄉縣宋臺梁館經

行遍帑錫從教父老分上珍獨向丘園薦三秋霜露石  
麟寒四世封章帝澤寬休對青山賦招隱早看黃詔促  
回鞍

送高大參升方伯入閩

昔我分符作荆守我公坐鎮黃河口繫馬殷王廟左槐  
開筵衛女堤邊柳公今參佐臨我邦我亦抱疴眠芸窓  
溪樹陰陰白日靜干旌時到木蘭艘回思十二年相見  
歲華倏忽驚流電路岐迴復餘萬程宇宙陰晴經幾變



憶公安得常見公古貌依稀魂夢中但看邸報知遷轉  
那記官階卑與崇餞賓雜遝喧徒御斜月蒼涼郭門曙  
獨鶴孤琴一蓋飄我公遠向閩山去人生垂翼豈有恒  
大舟淺水固難勝扶搖直上自此始公不見天池六月  
南飛鵬

送楊邃菴督馬關西

狼星掃天西戎來飛勒叩關關夜開當關空列貌虎士  
伏握不見麒麟材朝戰關頭暮關下瘡痍大半徒行者

箭書入報宵旰憂拊髀翻思大宛馬中丞主馬朝命新  
威霆動地驚故人長城迢迢亘西北萬里可當公一身  
秦苑草青秦水旨魯垞衛丘那足比我公息馬兼息民  
民保田廬馬生子天燠在野寒在槽馬子日肥民不勞  
三軍校閱錦雲亂萬蹄蹴踏沙場高將軍騎出諸羌遁  
玉門烽靜班超覲我願公歸登上台他日用賢如用駿  
送趙華鎮之東安

趙侯別我何所適華髮遠為淮甸客鎮日相逢只獨醒

主人笑君太拘迫簿書集案山嵯峨一入官曹事即多  
駒隙韶光最堪惜眼看春樹葉婆娑

趙南渚席上送秦鳳山分體得柏梁

我家東海君東吳一日相逢遊上都官居並結城南衢  
會面不問晨與晡登山臨水時一呼白馬青衫光照途  
見者謂是游俠徒豈知義氣卑王盧中宵坐感頭白烏  
朝辭闕庭暮江湖雲泥忽如鴻與鳧夕陽下樹秋巖孤  
迴風策策鳴脩蓋于嗟離心不可圖何時歸來江上臚

分題得鵲山湖送維正李憲副之山東

齊門東沙逕平雲羃羃湖冥冥使君來來麥秋晚柳陰陰  
畫舟遠瘦蒲疎荇逗遛香南浦烟光接西堰堰北山靈  
鳥聚對面潺湲華不注山前綠稼隱茅茨舊是齊儂釣  
遊處橫橈越水滸飛踏青芙蓉華陽洞口跨白鹿醉  
吹玉笛呼眠龍長鑣野老逐李邕錦袍仙人隨赤松石  
壁土花秋靡靡古蹤悠悠鎮如此要留酒斚洗蛙蟬雨  
林夜黑啼山鬼

送盛醫官歸吳中

昔我遊東吳訪君閭門郭石井泉邊晚開酌興來同上  
春雨亭醉裏不知江月落扁舟一為別幾見薜蘿春我  
綰曲臺綬君垂釣臺綸震澤霜波愁外渺虎丘雲樹夢  
中親四年不得一書札只問江頭來往人昨朝覲面鳳池  
曲鶴骨稜稜猶在目料君應恐驚世人角帶烏巾強  
隨俗世人久知吳下名喧傳盧扁今再生藥丸到處社  
席起大門小戶爭扳迎東樓一夜鄉心發忽著荷衣向

人別憎君歸計何太忙水上風煙觸炎熱玉芝瑤草滿  
山家住日應多來日賒願留丹訣與知己晚歲相尋凌  
紫霞

送陳邦瑞侍御巡按山東兼過山西省親

缺蟾墮崦闕樹蒼長河白淺波雲光殿中使者踏曉去  
驕馬遠餞金繡香齊山青青晉山紫兩地彩躔看柱史  
王程下放晝遊閒準背剛風薦千里山郊候人如羽立  
擗色郵郎報函急屈軼枝明海岳寒神羊影射狐狸泣

曲臺宦子離怨新四歲簪袍羞後塵拜君東行勿草草  
張桓已謝滂公老

送侯良弼之湯陰

虬鬚使君乘鐵驄鄴南古道行秋風居人不解明府號  
爭看印章垂赭銅使君登座衙鼓發簿吏趨蹌來走謁  
止是陽春一片心誰教化作琴堂月月明照見冰絲影  
流水聲高聞四境却記中條罷講時山雲夜覆簷花冷  
黃口小兒把刀筆抹黑批丹誇法律豈知漢吏推明經

不在區區三尺刑

送同年少宰汪閒齋考績北上

鳳闕開晴霞龍樓啼曙鴉春風上春月吹滿上林花上  
林花色明如繡亞相考功新入奏遙從花外駐公車更  
向花間聽禁漏禁漏丁丁雜珮環朱衣玉貌動宸顏銓  
司藻鑒懸秋水憲府威名重泰山廊廟雍容需袞職徵  
迎不用皇華敕元知北斗近三台早見東人歌九罭都  
下舊遊懷丙辰回頭二十九回春看花借問當時侶白



金史卷一百一十五  
卷二  
髮重逢今幾人

送都憲梅田顏公赴召北上

元精鍾海嶽勲業樹乾坤位極南曹長階遷北院尊晴  
雲開水寺旭日映江門江門水寺張高宴旭日晴雲麗  
京甸天府爭誇藻鑑名烏臺共識冰霜面涼風八月桂  
始花碧葉飄霜疑散霞軾前白鷺能窺隱冠上神羊慣  
觸邪神羊白鷺威千里川后澄波淨如几百度風行草  
野間群僚色動班行裏却憶武皇臨御初公居光祿禮

臺子含香近切奎三象秉笏親陪第七車二十年華速  
流電遲暮金陵重相見蹇劣甘投林下棲差池豈分江  
臯餞中興天子新舊邦須公開濟啓明堂大臣憂樂先  
天下記取希文記岳陽

壽屠左丞

異才生間世聲業播乾坤權總西臺長官登少傅尊青  
雲連甲第白日映高門高門甲第開華宴白日青雲麗  
芳甸縹緲鸞書海上來蹕蹕鶴馭圖中見涼秋九月天

宇空紫衢合沓飄香風黃封錫命來中使玉帶稱觴列  
上公上公中使分先後共指南山祝眉壽七十遐齡古  
已稀三千賀客今誰有南山何物比嶙峋雪鬢霜髯七  
尺身他日麒麟須畫像此時龍馬是精神予本東州牧  
羊子姓名曾入山公啓執豆叨瞻末坐光升歌敢並羣  
仙齒明公持法法不私春陽多在沍陰時漢廷赫赫名  
臣傳異代同倫張釋之

貞母行為楊晉叔母夫人壽

同牢不踰年中道相棄捐阿母當日心蘭室如黃泉兒  
生不見父但見山頭土向母索父啼母心良獨苦脫珥  
易書剪髮為羹粃粃三十霜兒也成令名成令名事元  
后封章來賁林藪鳳冠戕戕翔白首右珮瑤瑜左瓊玖  
天與喬齡報貞母不然安識少師門今有後

光祿丞為趙天挺乃翁壽

光祿丞白髮何髣髴壯遊江北老去歸江南江南水鄉  
地可住復可常釣魚以為羹汲泉為酒漿曉日張瓊筵

有客白其馬諸孫繞膝傍遊子拜庭下光祿丞福如岡  
壽如陵墅西十月梅花白不用登舟唱采菱

席上次韻劉鎮遠希召南雍劍客歌為八十翁

阮毅夫賦

虎頭突兀鳶肩高將軍將軍真古豪已有精忠貫白日  
更看逸氣凌青霄少年帶劍方城裏朝獵登山夕臨水  
結交意氣無南北俠侶遊朋來遠邇出門白馬驕如龍  
飛黃不受徒御驚心輕項羽匹夫勇身許蕭何萬世功

平生好詩有詩癖時向江邊尋古跡誰論北海孔文舉  
未數東山謝安石帳底高眠強敵愁共說將軍無與儔  
淮陰壯士富才略會稽老子多陰謀中年華髮忽成素  
歎息流光近遲暮辟穀真成陸地仙學易上究先天數  
子歌孫舞終日歡城有堞兮江有瀾他時漢水襄山道  
應見青牛西出關

畫松歌壽白巖太宰

今辰何辰到巖谷太宰堂中見喬木颯颯重簷風雨來

冥冥四座烟雲逐初筵賓客俱改容細辨始知為畫松  
霜柯雪幹槎牙起碧蔦青蘿宛轉封星除夜靜飛霹靂  
彷彿蛟龍在東壁培植深疑造化偏推移頗訝神功疾  
天生鉅材非偶然上摩霄雲下重淵已閱南山到平陸  
更看東海變桑田桑田平陸真俄頃古貌蒼髯歲華永  
天上休誇種白榆日邊謾說栽紅杏中興天子建明堂  
宰也執珪登廟廊松乎松乎合與宰為伍萬載千秋充

棟梁

張夏道中遇雨短歌示同行諸子

南山北山雨如注寒風颯颯吹山樹中河水發行子愁  
褰裳欲渡且復休黑霧蒼雲蔽村舍咫尺誰能辨牛馬  
嗟哉出門百里行路難我今胡為在中野

三月行

往年三月春多旱農夫望雨空愁嘆今年三月雨太多  
農夫轉愁傷早禾却憶先皇御宸極陰陽和調人足食  
萬方只解歌太平百姓何曾知帝力嗚呼鼎湖飛龍去



不返五風十雨何由得

題王二採蓮圖次壁上沈石田韻

秋塘露下菰蒲冷野鷺沙鳬夜相並東山月出一丈高  
岸柳垂垂見疎影雞鳴浦口漁伴稀自採紅蓮溪上歸

題石田畫二首為楊仲深作

夕陽半落羣峰高古林萋迷猿正號欲招同人眺野色  
安得揚州何水曹近烟蒼蒼遠烟白此時獨作村西客  
君不見石子岡頭蘿薜深麋鹿成羣詎相識

平生不識石田子往往相逢畫圖裏  
世傳百本無一真抹青塗紫俱門人  
秋高對此雙眼豁悠然置我溪與壑  
君不聞畫家貴意不貴工只在冥冥漠漠中

為王工部大用題菜園

采采雨間葉青青陌上春欲知疏溉力  
試問園中人紛紛鍾鼎徒醉臥飽肴  
載不謂丹青手能傳使君意使君有  
園十畝強時因採摘露沾裳短籬不  
許鄰雞入嘉味還同過客嘗後來勿  
斷園中土留取清風千葉長

題貞潔卷

貞比高陵柏潔比陰壑冰  
緬彼考槃客相思勞寢興  
至潔不可污至貞不可變  
兩世同一心百年能幾見  
柏有後秋葉冰有中夏寒  
貞潔苟弗渝炎雪何能干

題孔水部廷瑞雙鵲圖

戔戔中庭石傍此寒歲花  
離離錯錦繡五色明朝霞  
雙鵲何處來相對聲喳喳  
似為主人報水曹恩寵加水曹  
住近荆門肺千里洪流歸彈壓  
疏排不數賈讓功決淪

盡遵神禹法玄圭早晚當告成天王近日已知名崇階  
峻級懸相待豈用區區靈鳥聲

題白岩竹

竹枝裊裊根卓卓質堅不受苔蘚剝是誰向壁掃縑素  
古色蒼顏秋濯濯彷彿猶自煙水區萬里湘潭土新斲  
又疑身坐風雨窟老蛟盤拏突頭角醉呼虞帝歌南風  
蒼梧雲深翠華邈

題章郡守瓊林醉歸圖

宮楊媚朝旭溝水鳴春湍別殿黃金瓦橫橋白玉闌借  
問此何地無乃東長安長安陌頭二三月杏萼離離綴  
緋雪伊誰種此千萬株長待儒生與攀折孝皇龍飛十  
五春親策進士三百人是時嘉州有章子名姓赫赫驚  
朝紳白馬青袍速流電日中醉下瓊林宴吁嗟此日畫  
裏看猶似當年陌頭見陌頭畫裏兩模糊可道今吾非  
故吾南臺罷起郎官草東郡聊分刺史符皎月寒冰清  
譽在雲霄隨處是亨途

椿庭榮壽圖詩

白頭注書懶出門足跡不到東西村  
條忽移家向千里遠遊却謝君王恩  
錢唐夜舸衝潮發柏署啼鳥曉方歇  
升堂見子復見孫綵服如雲映秋月  
江魚竹笋稱觴暇時坐肩輿過城下  
蘇公堤上聞采蓮岳王祠前看走馬  
問君北歸今幾春予欲乘槎西問津  
渡河先訪封君宅攜酒來攀庭際椿

題楊四山卷

蒼峯崔嵬翠巘截案阿祖當年手親疊有得必失毀必  
成天道往復天心明我開我堂酌我酒藹藹嵐光映虛  
牖朝對圖書夕賓友楊家子孫千世守

題劉道行祖母拾禾教子冊

朝拾田中禾暮藝釜下薪止願兒力學不愁家業貧兒  
生有兒先入官可隨萬里居長安帝予封章不肯受却  
待成名報吾母江風吹船南入巴阿孫奉使兒還家拜墳  
呼母母不語淚濕秋山空黍花

題周道士采苓卷

夫椒山中多老松白雲隱隱盤蒼龍山人荷鋤采苓去  
往往仙人松下逢仙人本是山人作山人向來滿功課  
句麗勾吳幾萬里杏花陰裏春風大君不見蒲江古井  
凝綠華乳嬰綆上聲啞啞長秋道士不入口放魚女兒  
升綵霞

題工部李侍郎給餉還朝卷

旄頭焰射榆塞紅穹廬夜徙狼山東邊頭十堡九堡空



虎銜髑髏狐嘯風箭書入奏龍改色天兵嘽嘽下西北  
旌纛卷空空宇黑冬官老臣奉丹敕百萬芻糧紛崩劣  
插羽鳴金搗河殲朔方血雲蛇火赤勃勒殘兵走無迹  
歸來謁帝甘泉宮手執籌邊書一通當廷不數奪旗功  
嗚呼老臣開濟忠曉日沙堤散朝宴黃金廐馬輝相炫  
道傍觀者誰不羨韓公范老今重見

題李客部冊為其母受勅焚黃作

我我隴門碑蕭蕭墓田草春卿哭母處淚盡秋山道秋

山雲黃日脚斜立堂寂寂局土花祀筵俎豆雜五鼎玉  
文鸞紙明江霞月弦張宇登歲矢二十星霜一彈指欲  
問春卿哭母心潺湲日夜龍溪水水流不復返母去何  
時回金沙閭珠翠碧火揚青灰斷機壁空蛛網牽擣衣  
石冷啼蛄歇還家何物最堪傷白髮中庭坐明月

萱花圖送劉汝忠歸省

萱草花何裊裊春風入堂背遊子在遠道白頭慈親相  
對看日暮還成被花惱花未落子登堂白頭一笑千憂

志

海樵吟

海樵老翁居海島自言不及山樵好山樵伐木歸作薪  
隆冬滿室回陽春海樵網得珊瑚樹竈底欲燃燃不去  
日將空腹對家人敢向山樵論飽飫中興天子元會辰  
大開閭闔羅九賓勅使四方求寶貨海樵尚食山樵餓  
牽夫謠

上水逆風牽百丈官舸真同上天上後笞前咤輿皂獐

努力攬牽誰敢放人喜牽夫歌牽歌不知此中哀怨多  
何日黃流變黃土牽夫得免奔波苦

竹坡子辭為徐侍御作

坡之竹兮龍葱子攬轡兮在公子在公兮居靡遑蹇予  
獨兮坡之陽陽坡兮延佇竹裊裊兮含雨願扶質兮為  
簫和翔鳳兮儀鳴韶帝闕兮峻深與子歸來兮坡陰守  
虛靜兮抱貞素聽容與兮遲暮

愛日樓為錢水部作

錫山之樓水曹所構下瞰百川上臨斗宿層楣切霄飛  
拱麗畫龍鱗差差碧瓦齊峻梯蜿蜒垂丹霓俯視窮四  
極仰觀凌太虛雕楹列琪樹天窓秘靈書三光無冬春  
和氣通華胥不覩奇譎迹誰明此樓是仙居樓中之母  
健且康脩眉如髮雙瞳方雲冠我倒影煙袂飄空香真  
澄瑩含元穆坐樓中央蘭孫玉息獻竿稱觴擘斑麟炮  
紫凰進文棗傾瑤漿淋漓颯沓羅列趨跚舞拓拔歌陵  
岡一日願作千歲長千歲長萬歲久樓長新母長壽

弘治辛酉夏五月省元杜廷陳氏卧病旅邸予  
往問焉至則死矣逾四年其兄廷獻會予京師  
言及泣數行下且謂不可無詩以哭其弟也追  
憶往事為補此篇

切切重切切秋風桂枝折  
哀哀復哀哀人歸長夜臺  
桐為棺兮席為舍寒菴蕭條日光下  
孤兒五歲初學行向人啼父不成聲  
訪君來哭君去鄉路迢迢隔暝烟  
澼水萊山渺何處

輓秦國聲迺翁

天井峯頭暮煙紫  
少微星落山翁死  
山前新墓土累累  
石門題著封君字  
封君在時山水光  
雞羣寒鶴何昂藏  
一身獨作鄉社表  
見者呼為王彥方  
自從仙遊去不返  
江波寂寂江花晚  
釣竿三尺掛垂楊  
野迳無人竹門掩  
有生會有死全歸  
誠獨難名歸隱逸  
傳銜稱大夫官佳  
兒擅時譽采采雲  
中鸞恩華燭幽邃  
紫誥雙龍盤封君  
九原心亦安嗚呼  
封君九原心亦安

節義歌為方少參大器作

囊金失行子號還子以金不受絲與毫良人殂舅姑老  
環堵麻衣不識門前道吁嗟乎墓中人雖死死不孤諸  
郎致身文且武恩光下照幽泉土妻也貞姬夫義夫列  
傳有名光烈祖誰道今人不如古

朱子臯輓詞

約食墩前起新廟鄉人共說朱郎孝朱郎能孝復能仁  
眼看盜賊皆良民直擬貞心化強暴豈料勢窮翻殺身



金步尺 卷二  
君不見錢塘潮汨羅水同是乾坤忠義鬼春草碧色江  
綠波魂招不來將奈何

錢國子水南輓歌

君不見李世勣姊病親煮粥粥火燎鬚鬚為禿又不見  
閔子騫大雪被蘆裘一言悟父母復留水南茂才具二  
美白首窮經辟雍裏凍霧空嗟嶺豹藏春雷不見江龍  
起孝思之樓江水傍四時禴祀烝且嘗豈惟急難等原  
涉還誇遜產同王商白雞夢醒丹旌濕精舍玄猿終夜

泣憑將都士輓歌辭哀作它年聘君集


陳司寇輓詩

野白秋草黃頽陽下枯嶺誰歌蒿里曲悽緒紛難整  
矗起新墳素旗飄斷雲隴下笳簫哀響咽尚書不歸履  
聲絕履聲絕那可招山空石麟死松柏寒蕭蕭

王封君輓詩

兒在客父在床平生顏色不得一相見雖有湯藥何由  
將父在殯兒在野生前不受多史封空見龍光賁泉下

雪林山頭高築墳花烟漠漠愁青春請看阡畔行啼者  
半是當年懷惠人



華泉集卷二